


Ha kane ka kaim rep ka jong ka ia ki mar rep ka leit die sha iew Nongstoin, sha lewduh ha Shillong bad kiwei de ki iew ba marjan, ka ju shem ba ha ka por tlang ki duna shaba palat ki jhur ba mih na ki thain Khasi ka jong ngi, bun hi ki jhur na Assam bad ka dor jong ki jhur ruh ka long kaba heh bha. Kane ka la pynkhih ia ka jingmut ka jong ka bad ia ki group member ban leh eiei ha kane ka por ba shu shong aram lyngngai. Da kawei ka jingmut, ki la thmu ban rep jhur noh ha pynthor, ha kaba nyngkong eh mynba ki la sdang, ki shem ba ia ki jhur baroh la shah pynjot ha ki masi bad ki blang. Ki 10 ngut ki member baroh kiba dei tang ki kynthei suda ha ka kyrteng jong ka group ka jong ki ka "latreilang SHG" ki la thoh syndon da ka shithi sha u Rangbah Shnong ba un iarap ia ki ba ki don ka mon ban thung jhur ha pynthor da kaba un pyrkhing ia ki nongri jingri hapoh shnong. Kumta baroh arliang ki kynthei ba rep jhur ki ker sawdong ia ka jaka rep bad kumjuh ruh ki nongri masi ki shim khia ha kaba sumar ia ki jingri ba kin ym leit pynjot ia ki jaka rep jhur.

Kumne ka kong Angela kaba dei ka President jong ka group bad ki paralok group member ki ia pynkhreh ia ka jaka rep jhur hapoh pynthor kum u motor, u kajor naduh u bnai Nohprah ter ter ban ioh kheit ha u bnai laiong. Da ka jingiarap bad ka jingkitkhia lem na ka ophis jong U District Horticulture Officer, Nongstoin ka tnad ka Rep ka Riang ha kaba pynbiang ia u symbai bad ka um pynthor ki la kiew bha ha kane ka kam. Ngi shem ba ha u snem 2014 por tlang ka kong Angela ka la thung kumba 50 kg u motor NSCO bad ka ioh kheit kumba 3400 kg ne 3.4 tonne, ka die pat ha ka dor 50 tyngka shi kilo bad ka jingmih baroh ka long Rs. 1,70,000/- (Shi lakh hynniew phew hajar tyngka). Kumjuh ruh na u kajor symbai Kuroda ka ioh ban kheit kumba palat 1.6 tonne, ka die pat ha ka dor 30 tyngka shi kilo bad ka jingmih ka dei Rs. 50,000/- (Sanphew hajar tyngka) bad ka kong Angela bad ka group jong ki ka la nang iai pynheh ha kane ka kam kat haduh kine ki sngi. Kane ka group ha u snem 2015 ka la ioh ruh ka jingiarap da ka kali Bolero pick up na ka ophis jong U District Horticulture Officer, Nongstoin ka tnad ka Rep ka Riang da kaba thied shiteng dor

ha kaban kit bad pynpoi ia ki mar rep jong ki sha ki iew ki hat. Kane shisha ka la ai mynsiem ruh ym tang ia ka group bad ia baroh ki longing ha shnong ban thung jhur lem ha ka por tlang ha pynthor bad suki suki mynta ngi shem ba ki shnong ba marjan kane ka them Umyiap hi baroh kawei ki la bud nuksa ia kane ka rukom rep thymmai.

Ha ka por tlang naduh u bnai Rymphang shaneng haba ngi poi sha kine ki shnong ngin shem ba ka them Umyiap hi ka dap da ka jingjyrngam bad ka long kaei kaei kaba itynnad shisha ban peit ia kane ka jaka. Na ka liang ka ophis KVK, West Khasi Hills, Nongshillong ngi la ialap khana ia kane ka khubor babha ha ki nongrep ki shnong bapher bapher bad ngi la pynlong ruh ka Exposure Visit na ka bynta ki Sordar/Rangbah shnong jong ka Mairang C & RD Block bad Mawthadraishan C & RD Block ha u bnai Lber 2017 sha kane ka shnong Mawkynbat ba ki nongialam shnong kin ioh jingmut lem bad ban pynshlur ia ki nonrep ha la ki shnong ha kane ka kam rep jhur ha ka por tlang ba ka dei shisha kaba ai jingmyntoi shibun ia ki nongrep.



Ka jingpynkhreh iaka pynthor ha Mawkynbat ban thung jhur naduh u bnai Nohprah shaneng



*Ka pynthor rep jhur ha Mawkynbat bad ka por
ba sei sla u symbai motor*



Ka por puh syntiew u motor naduh u bnai Rymphang-Lber ha shnong Mawkynbat bad ka exposure visit under Rabi Campaign 2016-17 ia ki Sordar shnong ka Mairang bad Mawthadraishan C & RD Block sha ka ne ka shnong ba la pynlong da ka ophis KVK, West Khasi Hills ha ka 6 tarik bnai Lber, 2017

La Wad jingtip da:

Shri Ereneus Marbaniang

SMS (Extension)

KVK, West Khasi Hills

La Pynmih Da:

Dr. D. Pasweth

Senior Scientist & Head

KVK, West Khasi Hills

For More Information, Contact:

KVK, West Khasi Hills

KA SHNONG MAWKYNBAT-KA NUKSA BAN REP JHUR HA KA POR TLANG HA PYNTHOR

Ka Kong Angela Shangoi ka dei ka nongrep na ka shnong Mawkynbat, ka shnong kaba hap hapoh ka Mawthadraishan C & RD Block, West Khasi Hills district, Nongstoin. Ka don phra ngut ki khun, ka trei la ktah, ka kamai kajih thikna tang ha kane ka kam rep mynta la shispew snem kynthih bad baroh shiing ki iarap lang ha kane ka kam. Ka don ka jaka rep lajong kumba 4 hectar bad ha kane ka jaka ka thung ia u kba, u riewhadem, ki jhur ba bun jait kum u motor, u kajor, ki dhunia, u sohmynkem jhur bad kiwei de. Ka long ka brieve kaba kohnguh, kaba sngap bha ia ki jingbthah bad jingbatai na ki ophisar ka tnad Rep ka Rieng.

Ha kaba nyngkong eh, kumba long lem kiwei, ha pynthor ka kong Angela ka ju mlien ban thung tang ia u phan naduh u bnai Rymphang-Lber bad tih ha u bnai laiong-Jymmang, ka bet pat ia u kba naduh u bnai Jymmang bad ot pat ha u bnai Risaw-Naiwieng. Kumne naduh u bnai Naiwieng haduh u bnai Rymphang ka kong Angela kam ju pyndonkam eiei ia ka pynthor kaba mut kumba saw bnai eiei ia ka pynthor la shu iehnoh suda. Ki daw ba kam kwah ban rep ha ka por tlang ka long ba hapoh shnong hi baroh ki brieve ki ju pyllait lan ia ki masi, ki blang bad artad ba duna um ha pynthor.